

18 MAR 1997

PEMUDA UMNO AKAN TUBUH KELAB USAHAWAN TAN SRI YAHAYA

KUALA TERENGGANU, 18 Mac (Bernama) -- Pergerakan Pemuda UMNO akan menubuhkan kelab usahawan muda Tan Sri Yahaya Ahmad sebagai mengenang jasa tokoh korporat itu terbunuh dalam nahas helikopter dekat Kuala Lipis awal bulan ini.

Ketuanya Datuk Ahmad Zahid Hamidi berkata, Terengganu diberi penghormatan memulakan penubuhan kelab itu memandangkan bekas Pengerusi Kumpulan DRB-Hicom itu berasal dari negeri itu.

"Semangat keusahawanan allahyarham itu harus dijadikan contoh khususnya kepada pemuda-pemuda di negara ini," katanya kepada pemberita di sini.

Beliau berkata ia juga bertepatan dengan hasrat Perdana Menteri, Datuk Sri Dr Mahathir Mohamad bagi mewujudkan golongan kelas menengah melalui bidang keusahawanan.

Pergerakan Pemuda UMNO Terengganu akan membuka kelab itu di peringkat bahagian-bahagian setelah ia ditubuhkan di peringkat negeri, katanya.

Kelab usahawan itu akan bekerjasama dengan bank dan pihak-pihak yang ada kaitan dengan keusahawanan untuk memberi latihan kepada bakal-bakal usahawan, katanya.

Zahid dan anggota Exco pergerakan berada di sini untuk bertemu dengan anggota pergerakan itu dan juga para pemimpin parti di negeri ini. --

BERNAMA

IB PR